

1668

301

A R R E S T DV CONSEIL D'ESTAT.

Portant que les Constitutions que les Papes Innocent X. & Alexandre VII. ont faites à l'occasion du Livre de Iansenius, intitulé Augustinus, continueront d'estre observées; & que les contestations arrivées à ce sujet demeureront assoupies.

Du 23 iour d'Octobre 1668.

EXTRAIT DES REGISTRES du Conseil d'Estat.



LE ROY ayant esté informé par le Bref que nostre S. Pere le Pape a écrit à sa Majesté du vingt-huitième du mois de Septembre dernier, & par la viue voix du sieur Archevesque de Thebes son Nonce ordinaire auprès d'Elle, que sa Sainteté est demeurée pleinement satisfaite de l'obeïssance que les sieurs Euesques d'Allet, de Pamies, d'Angers & de Beauvais ont rendue aux Constitutions des Papes Innocent X. & Alexandre VII. du 31 iour du mois de May 1653. & 16 Octobre 1656. tant par la signature sincere qu'eux mesmes ont faite, & qu'ils ont ordonnée dans la conuocation de leurs Synodes à tous les Ecclesiastiques de leurs Dioceses, du Formulaire de foy

2
inferé dans la Constitution du mesme Pape Alexandre VII.
du 15 Février 1665. que par les Lettres que lesdits sieurs
Euesques ont écrites au mesme mois de Septembre der-
nier à sa Sainteté pour l'asseurer de leur soumission ausdi-
tes Constitutions, & qui ont porté sa Sainteté à vouloir
bien oublier tout ce qui s'est passé jusques icy pendant les
dernieres Contestations ; comme aussi ledit sieur Nonce
ayant témoigné à sa Majesté que nostredit S. Pere desiroit
instamment de sa pieté & de son zele accoustumez, pour
le bien de la Religion, la paix de l'Eglise, & le maintien
de l'union entre tous les fidelles, que sadite Majesté eust
agreable d'employer fortement son autorité Royale
pour empescher que ces mesmes Contestations qui ont
agité l'Eglise de France depuis quelques années à l'occa-
sion de la condamnation du Livre de *Iansenius*, intitulé
Augustinus, ne pussent se renouueller en quelque maniere
que ce soit : Sa Majesté voulant y pourvoir & seconder
les saintes & pieuses intentions de nostredit S. Pere, &
donner moyen à l'Eglise de profiter aduantageusement de
la paix que sa Sainteté a eu la bonté d'y reestabli : LE
ROY estant en son Conseil a ordonné & ordonne, que
lesdites Bulles & Constitutions cy-dessus énoncées conti-
nueront d'estre inuiolablement obseruées & executées en
toute l'estenduë de son Royaume, Pays, Terres, & Sei-
gneuries de son obeïssance ; exhorte, & neantmoins en-
joint à tous les Archeuesques & Euesques de sondit Royau-
me d'y veiller & tenir soigneusement la main : ORDONNE
que les contrauentions & inexecutions faites ausdites
Constitutions & à la Declaration de sa Majesté du mois
d'Avril 1665. demeureront comme non aduenues, sans

qu'elles puissent estre iamais renouuellées par qui que ce soit, & sous quelque pretexte que ce puisse estre : A fait & fait inhibitions & défences à tous ses Sujets de s'attaquer ny prouoquer les vns les autres sous couleur de ce qui s'est passé, vsant des termes d'Heretiques, Iansenistes & Semipelagiens, ou de quelque autre nom de party, ny mesme d'écrire & publier des libelles sur lesdites matieres contestées, ny de blesser par des termes injurieux la reputation d'aucun de ceux qui auront souscrit ledit Formulaire de Foy par les ordres de leurs Archeuesques & Euesques, à peine de punition exemplaire. Et sera le present Arrest executé nonobstant oppositions ou appellations quelconques, dont si aucunes interuiennent, sa Majesté s'est reseruée la connoissance, & à son Conseil, & icelle interdite à toutes ses Cours & Iuges. FAIT au Conseil d'Estat du Roy, sa Majesté y estant, tenu à S. Germain en Laye le 23 iour d'Octobre 1668. Signé DE LIONNE.

*Collationné à l'Original par moy Conseiller
Secretaire du Roy, & de ses Finances.*

Case

Wing

folio

02

144

.A1

v. 2

no. 35

THE NEWBERRY LIBRARY

to